

PORI MA TAITASIN UVAMAN AMEIN BOMPON MINO (Taitasi)

Taitasi Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ino.

Uvarein orana ino.

AD sikisti-sikisi (66) fin mino. Mai maen Pori ma karavusi finte ma utúantan ma Romú baru me ampiren bei yoraríen nóken mino.

Ma vompon ma uvantein baru ino.

Masedonia safi Efesasi safi áa Nikoporisi safi sen amino iyan mino. (Taitasi 3:12 fin ná onano.)

Ma vompon ma uvaman amikhein banta ino.

Ena anan pinte vanta ma Porin arona váken ma ven ayaen monó doraríen noré ein banta Taitasin mino. Máan tiyaren maen Kirití musóká o váken monó dorarí iyan mi uvaman amikhen mino.

Nái ana vará ma vompon uvanten nafino.

Taitasi ma Kirití musóká monó dorarí iyáken ma uman dosiyain nan mi ará ákona uanten inká manáa yorani aa aní uanten ukhen mino.

Pori Ma Taitasin Uvaman Amein Baya Ino

1 ¹Téi Pori Ti yarafenui miyan ída varan doran bantan báké Yisas
Karaisini vaya varen mo siamin banta uno. Béi anon téin tisintein

mai ma veyan iyákein nanin bantai mumunan ayaé mo ákona uantékun Tiyaarafenui fura sikhein baya vá avúavá bá afová uren béin ánanin bákurinten mino. ² ^aMa fura sikhein baya ano mai ma Tiyaarafenu ano fara van oriyen ban aunan amenté uno siren iyáantan bain nanin bantai mumunan má afova vá ákona uantanten mino. Pefá ída minó daná afoká ukhan mai ma fara van oriyen ban aunan timeno van tiádan baren mino. Tiyaarafenu ano ída setí ankan kampun tisinté iyan mino. ³ Pefá ma véi siádakaré ein damú pura sen afoká íkan mi vei Kama Vaya mamen amasi urái mai Vaya setí ankan minó nanin bantafin tian amá iyá uno. Mai ma setin evaránen tivíkein mai Tiyaarafenu ano séin aní uren beni yorari ino van tisintái ma Vaya minó nanin banta siamiyá uno.

⁴ ^bTaitasi oe, erasanti mumunan mano manaí ukha, éi sen tanin an mi yakhen ná ma vompon éin uvaman amé uno. Tetin Tifóe Tiyaarafenu vá tetin ma siya uren tiviran banta Yisas Karaisin mái sarisari vá ará kusin masá éimpin bano.

Taitasini Yoran Kirití Musóká Ban Mino

⁵ Erasan ma ída yóan kípakheruna yoran dóan kípiyákeya séi ma siamerunaí e vá minó kákan baru kayo fimpá Yisasini mumunan nanin bantai yoran banta kayo khaono van mai anarái éin Kirití Musóká me afaé uno. ⁶ ^cMai yoran bantai avúavá ano vanasi avorá puntákantin be aná bá ana vá puntáden bano. ^d Béin akhafana ano yere vá monópin mana váken be anóe afóeni vaya ída átakharé uren ma fon iyani avúavá ma ída variyantiya vá mai vá ódeya avirano. ⁷ Tiyaarafenu ina yanáká ma yafisin bantai avúavá ano vanasi avorá puntáken ná bano. Béi ída vá bei aví daní uren ena aví mamen bararasíen ná inká ainen aran ádé bain banta váken ná ída vá óen non naren ná aruvono van ino. Béi ída vá banasii ona kampun tiren baren ná inká moníká ana inin kaen ná ino. ⁸ Máan tin nafo ena nanin banta ano ma véin amápin ma erintin ná avábasá ino. Béi minó kama avúava san mana vá anunu iyáken kama ineine ánanin bákuriyan dafíken ná bano. Béi vei ineinerá dafíben ná puntáden kantasí ukhen bano. ⁹ Mai ma fura vaya véin pefá tiamikhá ein ná pákaaren mantaan ákona ino. Mantaan ma ákona uven maen puntákein bayafó ákonaen banasi siamiyáken ná inká mai ma fura vaya ma namuroí iyain kayo vá puntarano.

^a 1:2 Kor 1:27 ^b 1:4 Rom 1:7; 2Ko 8:23; Kar 2:3 ^c 1:6-9 1Ti 3:2-7; 2Ti 2:24-26

^d 1:6 Manáa afova vanta kayo ano mai van máa sikhen mino. *Mana nanin máa vá barano.*
Ena afova vanta kayo ano mai van máa sikhen mino. *Ída vá anasi máde ifá urú urú en nono.*
1 Timoti 3:2, 12 fin dere vá onano.

Kirití Musóká Ma Namu Avúavá Bariyain Kékái Vaya Ino

¹⁰ Para vara seyo, vaya ma átakharéin nanin banta kokhon mi Kirití musóká ban mino. Bení ana i vain baya ma sian pura yanasí uren banasi ma máka sen noin kéká kokhon mi van mino. Mai kéká pinté au khavin avúavákái Tiyarafenu ano evaránen aviranten mino ma siyain kéká anon moéken pura ma seiní iyan mino. ¹¹ Pura sikhein baya fókesá betí aa iyádesin ná betí avaya fákano. Para vara seyo, vetí ankan banasii ona vá moní bá kampun tiriyá barano van ída ma siameren baya e sian more mere iyan banasii van máden asuse iyan mino. ¹² Kiriti kayo van kampun baya ana siyáken afá pon an den nóken avesara ana iyan ban kéká ino sen betí sakhanampa vanta kayo finté mana ano sian dákó ukharen mino. ¹³ Ma fura sen afoká ukhein avúavá baya ifo vá mai avúavápin ma oferiýain kéká au fin ná ákona e vaya siamiyasín ná mai ma fura sikhein avúavá ánain mana vá bákurino. ¹⁴ Yutan kayoi anafu aráoni maní bayará ma ákonaen tiamen nóken pura vaya ma yo ékiyain kékái vaya ída vá inino. ¹⁵ Ará ma avusese ukhein kayo ina yanasinta minó avusese ukhen mifo ará ma fainí ukhan ída mumunan iyain kayo ina yanasinta ída avusese ukhen mino. Betí ineine vá kama yaná bá namu yaná bá ma afováin asuse ukhen mino. ¹⁶ Betí ankan oo máa fókéi Tiyarafenu van afová ukhé uno sé iyan mifo vetí avúavá ano ída véin bákuriyan mino. Máan tiyáken betí ankan Tiyarafenu van ída anunun inian kaupman uren baya átakharé iyain ída kanaíen mana kama avúavasí inten mino.

Pori Ma Taitasin Nan Puntákein Afova Vá Ameno Sein Baya Ino

2 ¹ Máan tukhen mifo Taitasi oe, intéa vaya ákonaen puntákein ban nafi mai vá banasi siamesin ná afova uren dakhafino. ² Anon banta kayo afova amesin ná ída óen non nen asuse en nóken ná betí ineinerá dafisino. Máan tiyáken inká kama vanta ino siyantín ena van anunu iyáken ná mai fura vayará mumunan ukhen ná mireníen uman eriyantín mantaan ákona ukhen ná bano. ³ Mai ma anon banta kayo siameonaí ana e vá anon nanin kayo siamesin ná betí avúavá bá inin onan má pura sen Tiyarafenu arasá dantin bano. Máan tiyáke ída vá baya uvaman more mere en ena nanin banta aran amiyáken ída vá áintín óen non naren ma óen in anunu ano vetí inintá dafisino. Mai ma kamaen puntákein avúavá ana vá ena nanin banta aní ino. ⁴ Máan tiyáken ná auyen nanin kayo vá kama afova amintín ná be avafu akhá avábá ino. ⁵ Inká betí ankani ineinerá dafíben Tiyarafenu avorá puntáken ban ná mápín kamaen dafisiyáken kama avúavá ana variya ná betí avafunái aránaópasá oriyan bano. Betí

^e 1:10 1Ti 4:7 ^f 1:11 2Ti 3:5-6; 1Pi 5:2 ^g 1:13 2Ti 4:2 ^h 1:14 1Ti 4:7 ⁱ 1:16 1Yn 1:6; 2:4
^j 2:3 1Ti 3:11 ^k 2:5 Efe 5:22

ankan mai avúavasí ma intin maen minó nanin banta ano Tiýarafenui vayará ída oyampá baya sinten mino.

⁶Máan mana e vá minó pumara vanta afova amire ayaesin ná betíí ineinerá daffán ákona ino. ⁷¹Minó danasí ma inonafin ná ei kama avúavasá aníesin ná mai fumara vanta ano ódaren ná mai ánain mana vá dakhafino. Inká Tiýarafenui vaya ma sian afova ma ameno van éi fúkekhahe vá ineine ure funtáde fura vaya ana vá tiameno. ⁸^mÉi ma funtákein baya ana ma siyasin maen maifin ída namu ukhantin banasi ano oman afoká inten mifo namuroí ma iyain kayo ano vetí ma siyain baya van ayave uren ída setin toyampá baya sinten mino.

⁹Ída miyan baran doran banta afova amesin ná betíí yafisin banta aránaó báken betíí yoran bariyan ná doran nan ma siantantin ída vá evaránen anona vaya sino. ¹⁰Inká ída vá betíí yafisin banta kayo ina yanasinta umoyan barantin ná betin oman pura yoraríin kéká ino vá tino. Máan siyantín ná minó daná ma varan nain mano setin ma Evaránen Tivíkein Tiýarafenui vaya ma ena nanin banta ano iniyáken kama vaya ino sinten mino.

¹¹Para vara seyo, Tiýarafenui sarisari ano ma vanasí ume fintena ma evaráne avíkein aa inka minó nanin bantafin dákó en mino. ¹²^oTiýarafenu ma oyan amin avúavá bá inká ma vara ráke namu avúava san ma anunu uren mai ánain bákurin má ifá inon tiren mi mai sarisari ano saréa setin tisimiyan mino. Tíretíí ineinerá kama e yafíbe nóke ákona e mantakhe vá Tiýarafenu van peran kékasá bano sen tetin tisimiyan mino. ¹³Mai ma setisi kákan Yisas Karaisi ano ma Evaránen Tivíkein Tiýarafenu ma vei kakhampin ma afoká inain nan tetí inikhé timusin iyá ave ukhé tiféuno. ¹⁴^pMai ma setin nare siren ma ve au fóké ma namu avúavá pintena ma miyaní uren ma setin evaránen tivíden tesé uan avusese uren ma ve inai ukhein mai nanin banta ano kama avúavá ana varano van mi iyan mino.

¹⁵^qMáan tukhein nan mi Taitasi oe, mai ma éin tiameruna vaya kayo vá ena ena yamú minó nanin banta siamiyáke vá baya ma átakharéin kéká sá ákonae funtarano. Mai ákona éimpin ban mifo ída vá áesin éi ma sinona vaya van mana nanin banta ano oyampá baya sino.

Pori Ma Vanasi Van Puntákein Avúavá Ana Vá Barano Sein Baya Ino

3 ¹Banasi evaráne siamesin ná kamanin má beni ánon banta kéká báí aránaópa sá báken betin oo yayiyian ná kama avúavá barano van utaaren ná bano. ²Inká ída vá ena oyampá baya siren aruve asive iyáken ná bempáke sá ará kusen bano. Betí ankan puntáden báken ná ena nanin banta fura avúavá aní ino.

¹ 2:7 1Ti 4:12 ^m 2:8 1Pi 2:15 ⁿ 2:9 1Ti 6:1 ^o 2:12 1Yn 2:16 ^p 2:14 Eks 19:5; Diu 7:6; Isi 37:23; Kar 1:4; 1Pi 2:9 ^q 2:15 1Ti 4:12 ^r 3:1 Rom 13:1-7; 1Pi 2:13-14

³Pefá tetin má dere vaya átakharé iyáké maka siré óen avúavápin timusin dosé nókun mai ano setin damuádá baré tiféuno. Maifin ma vá tifékun maen namu avúavá bá ume avúavá bá ano setimpin bíkakhá ena ina yana san tiran niyáké ben ará namu uantan maran iyaré uno. ⁴⁻⁵“Máan tiyaré tifé umpo setí ankan ma Evaránen Tivíkein Tiyarafenui anunu vá avábá bá ma afoká ein nan mi véi setin evaránen tivíken mifo seti ma funtákein avúavá bariyaré é tiferuna rasa ino. Ída ino. Bei arunanápói setin evaránen tivíken mino. Tiyarafenu ano Kantá Aunan pói setin tesé uren evaránen maman auyení urá bá tiféuno. ⁶“Tetin ma Evaránen Tivíkein Yisas Karaisin pintéi uaren Tiyarafenu ano vei Kantá Aunan ída fákan tetin timaniná banaen mino. ⁷Máan turanti mae Tiyarafenui sarisarirá tetin nan ída umeí ukhein mino siren para van oriyan ban aunan nan ma iyátintan bain ída aa iyarantí barano van ma ave ukharé eruna kasaé tetí ankan bará tifanté uno. ⁸Taitasi oe, ma ma éin tiameruna vaya vará pura sen puntákein baya ino vá teno. Mai vará éi ma vaya fara e siame oriya vasin ná Tiyarafenurá ma mumunan iyain kéká ano yaffben kama avúavá ana vá barano. Mai vaya ánain ma vákurin nain kéká mai vaya ano kama ayairí inten mino.

Porini Kípan Baya Ino

⁹“Máan tinten mifo mai ma ída kama ineine van ma asuse vaya kayo sen nóken ma vanasii ineine máden namu iyan ma inká be anafu aráon aví para vano van ma séi ven ana ayavéno uno siríyan ma vetíi man bayará bákuriyan ma aruve asive en noin kéká ádé ída vá orono. Mai fara vara seyo, mai vaya kayo maen asuse vaya kayon báken mai ano ída kanaíen éin aya inten mino. ¹⁰“Manáa uman afoká inafó vá mai ma nóken betíi vayará ma ákona e nóken kampun baya kayo fóké ma ena monó kéká arápiníen ma noin kéká ma siamesin ída ininti inká evaráne enádá tiamesin ma ída ininti mai ída vá oo aí iya mairasá mo ífá ano. ¹¹Éi afová ukha ono. Máan bantai avúavá ano ída funtákan bei umefin bákan mai anon béin daimiyan mino.

¹²“Ínainmpáké ma Atemasin nafi Tikikasin nafi ma siantékun ma eni varu varen eni yoran aya ono van ma éi vaonará ma o unintiya éi aine vá aaí ureya Nikoporisí barurá ereno. Mai fara vara seyo, iyon aú ma afoká inainpin mai varurái o vanté unon té inikhé uno. ¹³“Aporosin nú man baya afova vanta Senasin nú ma mairá onóben ma intéa yanasará inten nafi mai éi ayampaí ure vá mai yanasinta ayaesin ná mamaren orino. ¹⁴“Tetin má ma monó tiyain nanin banta ano kama avúavá ana ma varen

^s 3:3 1Ko 6:9-11; Efe 2:1-2; 5:8 ^t 3:4-5 2Ti 1:9; Ibu 10:22 ^u 3:6 Apo 2:17-18 ^v 3:9 2Ti 2:14, 16 ^w 3:10 Mat 18:15-17 ^x 3:12 Efe 6:21-22; Kor 4:7-8 ^y 3:13 Apo 18:24; 1Ko 3:5-6 ^z 3:14 Efe 4:28

oriyan bani ana ma afová uren maen mi yunan má ona vá ma ída van nain kéká kasaien aya iyáken asese nanin banta anan banten mino.

¹⁵Téin má ma minó mumunan nanin banta ma vain mano amusin baya siádákan éi vaípa oren mino. Taitasi oe, éi vá Kirití ma mumunan nanin banta váken tetin nan anunu iyain kékasá amusin baya siameno. Tiya rafenui sarisari ano vá tiretí ankan má bano.